

29 AUG 2002

Prima-Pekerja

JANGAN KELUARKAN KENYATAAN YANG BOLEH MENCETUSKAN KETEGANGAN

KUALA LUMPUR, 29 Ogos (Bernama) -- Lembaga Persahabatan Indonesia Malaysia (Prima) menyeru semua pihak di Indonesia dan Malaysia supaya tidak mengeluarkan kenyataan berhubung isu pekerja Indonesia di Malaysia hingga boleh mencetuskan ketegangan antara kedua-dua negara.

Ketuanya Try Sutrisno menasihatkan rakyat Indonesia supaya tidak melakukan tindakan yang boleh menjejaskan usaha penyelesaian masalah yang melibatkan tenaga kerja tanpa izin Indonesia di negara ini.

"Kami menyeru agar masyarakat Indonesia menahan diri dan tidak mudah terpengaruh hingga melakukan tindakan yang destruktif yang boleh mempersulitkan proses penyelesaian tenaga kerja Indonesia," katanya dalam satu kenyataan hari ini.

Kenyataan Try yang dikeluarkan di Jakarta hari ini, diedarkan kepada media di Malaysia menerusi Wisma Putra.

Katanya kedua-dua pihak harus menjaga hubungan baik yang sedia ada dengan saling menghormati dan mempercayai antara satu sama lain.

"Kami percaya Indonesia dan Malaysia telah melakukan usaha yang konstruktif menyelesaikan permasalahan ini dengan baik," katanya.

Bagaimanapun, katanya, penyelesaian berhubung isu itu memerlukan masa kerana banyak prosedur yang perlu dipatuhi.

Beliau juga menyeru warga Indonesia yang bekerja di negara ini supaya menghormati undang-undang di Malaysia dan tidak terpengaruh untuk melakukan tindakan yang boleh menimbulkan pergaduhan demi menjaga nama baik warga Indonesia keseluruhannya.

Prima, dan rakan organisasinya di Malaysia, Lembaga Persahabatan Malaysia Indonesia (Permai), ditubuhkan untuk meningkatkan hubungan dalam bidang pendidikan, sosial, budaya, ilmu pengetahuan dan teknologi serta bidang kemanusiaan.

Kedua-dua pertubuhan menandatangani memorandum persefahaman untuk melaksanakan kerjasama dalam bidang-bidang berkenaan di Istana Tampak Siring, Bali pada 9 Ogos lepas disaksikan Perdana Menteri Datuk Seri Dr Mahathir Mohamad dan Presiden Indonesia, Megawati.

-- BERNAMA

MUN AHH ZB